

1614. Juillet 13.

102

136.

L'ORACLE
DE LA
PVCELLE
d'Orleans.

3033

PROPOSE' AV ROY, LE
Dimanche treziesme de Iuillet; où
sont desdrites les Royales
aduentures de sa
Majesté.



13 Juillet

A PARIS,

De l'Imprimerie d'ANTHOINE DV BRVEIL
rue S. Iacques, au dessus de S. Benoist,
à la Couronne.

15 pp
coll
m

M. D. C. XIV.

370



L'ORACLE DE LA

Pucelle d'Orleans.

Proposé au Roy, le Dimanche treziesme de Iuliet; où sont desduites les Royalles adventures de sa Majesté.

SIRE,
Cen'est pas icy vne Oracle,
tel que celuy de la Prestresse
d'un faux Apollon, lors que grosse
du Demon qui la possedoit, ayant la
couleur passe, les yeux esgarez ça &
là, les cheveux herissez, & tout le
mouvement du corps furieux; elle
proferoit sur le trepied certaines pa-
roles equivoques, & si ambiguës,
qu'il falloit tousiours vn interprete,
pour les rédre intelligibles & claires.

A ij

Cen'est point encore vne prediction fabuleuse, & qui promette des choses impossibles, comme celle de la Sybille de Cumes; ou des euemens incertains, & tels que ceux qui sont attribués par Lucian, aux prestiges de l'imposteur Alexandre. Mais c'est bien plustost vn veritable presage, & vn tesmoignage asseuré de vostre future grandeur. Car s'il est ainsi que des antecedens on tire les consequences de l'aduenir, il ne faut pas douter que les merueilles qui ont esté predittes de vostre vie sont infalibles, & qu'une partie d'icelles estant desja reüillie, elle cõfirme la creâce que nous mettons sur les heroïques aduantures, que tout le monde attend de vostre valeur.

Les courages braues & genereux, dict vn Poëte, engendrēt tousiours leurs semblables, & iamais les Aigles inuincibles ne font voir le iour à des

Coulóbeaux paoureux & sans cœur.
 Vous estes fils, SIRE, du plus grand
 Prince del'Vniuers; de qui la valeur
 doit viure eternellement en la bou-
 che des hommes, comme incompa-
 rable, & digne d'estre reuerée par
 tous ceux qui viendront apres nous.
 Aussi pouuons-nous bien dire de V.
 M. qu'elle est l'Aigle dont l'aspect a-
 greable est vn Soleil à soy-mesme, &
 au Ciel de la France.

Vne Pucelle, François de nation
 & d'effect, (qui fit iadis pour la def-
 fense de sa patrie, des exploits que
 toutes les Amazones n'eussent peu
 faire en vne semblable rencôtre, lors
 que son bras armé d'une force cele-
 ste, repoussa les peuples du Nord,)
 vous appelle ainsi, SIRE, pour mô-
 strer que vous estes parmy vos sub-
 jets, ce qu'est l'Aigle entre les autres
 oyseaux; & que vos armes victori-
 euses doiuent faire des conquestes

esmerueillables aux yeux de tout le monde. Voicy les vers, ou pour mieux dire les Oracles qu'elle en rend, qui font comme vn Epitome de toutes vos aduentures Royalles.

*Au grand Palais de la belle fontaine,
S'esclot vn Aigle, & se baigne dans l'eau;
Puis s'esleuant au Chasteau de la plaine
Nômé d'un Saint, il vole en son vaisseau.*

*Dedans Hereims la Royale Couronne,
Orne le chef de cest oyseau vainqueur,
Et dessus luy distile vne liqueur
(Present du Ciel) qui la force luy donne.*

Il n'est celuy qui ne voye à l'œil, que dans ces huit vers la Pucelle comprend les principales choses qui sont aduenues à V. M. depuis son heureuse naissance iusques à maintenant.

Par le Palais de la belle fontaine, où l'Aigle s'esclot, elle entend vostre Cha-

Reau Royal de Fontainebleau, l'ancienne retraite des Roys Tres-Chrestiens vos deuanciers, où par vne grande grace du Ciel vous auez esté donné à la France, comme vn bel Astre durant le silence de la nuit; & en vn temps vraiment Alcyonien. Ce qui nous est vn presage certain d'un Estat calme & paisible, sous vostre regne.

Par ce demy vers, *Et se baigne dans l'eau*, elle denoté l'eau du sacré Baptême de laquelle vous fustes arroulé cinq ans apres vostre naissance; avec toutes les ceremonies & les magnificences qui vous sont deuës, comme au Roy Tres-Chrestien, & au fils aîné de l'Eglise.

Nostre Sybille François montre encore, comme V. M. fut depuis eleuée à S. Germain en Laye qu'elle appelle, *Le Chasteau de la Plaine nommé d'un Saint*, tât pour son agreable

situatiō que pour exprimer le Saint dont il porte le nom.

A ces mots, elle adioust que cest Aigle ainsi esleué s'envole en son Vaisseau; c'est à dire, que V. M. ayāt passé les premieres années à S. Germain, s'en vint depuis à Paris la Capitalle ville de son Royaume; qui porte pour armes vn Vaisseau, comme estāt le Nauires de la France, contre lequel les tempestes n'ont point de pouuoir, puis qu'il a pour gouuernail ce Royal nom de L O V Y S.

Les quatre vers suiuians, démontrent le Sacre, & le Couronnement de V. M. dās sa ville de Rhēims, qu'elle nomme Hereims, par vne transposition des lettres. C'est-là, SIRE, où vous auez reçu la premiere Couronne de l'Vniuers, en l'vne des celebres Eglises de toutes la Chrestienté; assiste des plus grands personnaiges de vostre Frâce. C'est là où Dieu

VOUS

vous a oingt, par la main de ses ser-
uiteurs de ceste huile de lieffe, de ce-
ste liqueur, qui ne le tarist iamais dās
sa saincte Ampoulle, & de cest Elixir
de vie, qui affermit les courages des
Roys, & qui les arme de force cōtre
leurs ennemis.

Plusieurs euenemens grands en
apparence, & encore plus releuez en
effect, presagerent la fortune d'A-
lexandre. L'on tient que sa mere O-
lympias, estant enceinte de ce Mo-
narque, il luy sembla voir en songe,
que de son ventre sortoit vne vigne
qui s'estādoit par toute la terre. No⁹
pouuōs dire le mesme de vos sacrez
Lys, SIRE, dont les branches victo-
rieuses, autāt cheries, que redoutées
dans le monde, doyuent ombrager
vn iour ses plus loingtaines cōtrees.

Ceste mesme Pucelle, qui receut
du Ciel le don de predire les choses
futures, le confirme ainsi par l'Ora-

cle suiuant, où elle cōtinuë à couvrir
sous le nom de l'Aigle, la verite de sa
prediction.

*Je voy des-ja cest Aigle magnanime
Aupres des murs de la Saincte Solyme,
Sur le Soleil du Persan voltiger;
Briser la corne au Croissant infidelle,
Raser Memphis d'un seul coup de son aile,
Et tout soudain en Phenix se changer.*

Qui ne voit que par cest Oracle,
elle promet à V. M. la conqueste de
la terre Saincte: lors qu'ayant faict
rebastir les murailles de Hierusalem;
vous irez combattre le Sophy dans
son pays, suiuy d'une troupe de Pal-
ladins Chrestiens; & luy arrachant
des mains son enseigne de guerre,
où il porte le Soleil pour deuise, le
rendrez tributaire à la triomphante
Banniere de la Croix? Vous en ferez
autant au Croissant, & à la superbe

Cité de Memphis, qui sera contraincte de soubmettre son orgueil à vos pieds.

Après tant de genereuses conquestes, SIRE, lors que vous aurez range sous le drapeau de la foy ce peuple infidelle, nostre Sybille adjouste que V. M. sera changée en Phenix, c'est à dire que ses heroïques actions la rendront immortelle, & digne que la posterité la comble de benedictions eternelles.

Voyla, SIRE, l'Oracle que nostre Pucelle vous presente aujourd'huy, pour vn tesmoignage des merueilles de vostre vie, & du zele qui nous obligé à vostre seruice, comme vos tres-humble subjects. Elle le puise es viues sources de la verité, non dans les fontaines Augurales de Castalie. Le Genie qui l'inspire est François, & tutelaire de vostre Courône; pour la defence de laquelle il a tousiours

combattu.

Le plus renommé de tous les Oracles estoit celuy du Temple de Delphes, où Apollon receut en don des carreaux d'or, qui luy furent consacrés pour des predictions ambigues. Vous estes nostre Apollon, SIRE, dont les discours sont autant d'Oracles qui nous assurent de maintenir en Estat la concorde & la paix, à laquelle V. M. doit bastir vn Palais plus durable que ce magnifique Temple d'érain, qui luy fut iadis voüé par Cn. Flavius.

Ce mesme Dieu (disent les Poëtes,) se voyant mocqué par Cassandre, (à laquelle il auoit accordé le don de sçauoir l'aduenir, sur l'assurance qu'il se donnoit de receuoir d'elle, ce qu'il auoit desia tiré de la Sybille de Cumes,) pour se venger de la perfidie, il voulut que ses predictions fussent infallibles, pourueu que leur

euenemēt semblât impossible à ceux
qui les escouteroient.

Nostre Cassandre Françoisen n'en
fait pas de mesme à vous, SIRE, qui
estes son Apollon. Son Oracle ne
promet rien à V. M. que l'effect ne
s'en ensuiue tout aussitost. Et voyla
pourquoy nous tenons pour certai-
ne l'issuë qu'elle predict à vos Royal-
les conquestes.

Quelques vns ont voulu dire, plus
par flatterie, que par deuoir, qu'en
l'entree de Tybere dans Rome, vn
Soleil fut veu rayonnât sur son chef,
en forme d'une Couronne. Mais
nous ne mentirons point, si nous
disons qu'à cet heureux iour, auquel
V. M. paroist dans sa ville d'Orléas,
elle est le Soleil leuant qui par ses
rayons eschauffe nos cœurs, & qui
par vn fauorable aspect, les remplit
tous d'allegresse.

La presence de V. M. SIRE, nous

est beaucoup plus chere, que n'estoit le Simulachre de Pallas aux Troyens, ny que cest autre Palladium, qui fut consacré par Nicias à la forteresse d'Athenes. Nous le reuerons tellement, qu'il nous est impossible de tourner nos yeux & nos pensées ailleurs. Et tout ainsi que Pyrrhus apprit du deuin Helenus fils de Priam, que Troye ne seroit iamais prise, tant qu'elle garderoit la statuë tutelaire de la Deesse Minerue; De mesme l'Oracle de nostre Pucelle nous affermit en ceste creance; Que nous serons tousiours inuincibles, tant que nous porterons imprimee dans l'ame l'Image sacrée de nostre Prince.

Le deuoir nous y oblige, SIRE, outre que nous y sommes poussés d'une inclination naturelle, comme vray François, qui ne cherissons rien tant, que le bien de nostre pa-

trie, la conseruation de l'Estat, & la prosperité de vostre Royale personne.

Pour vn plus ample tesmoignage de ceste affection, nous marquerons de blanc (à l'imitation des Anciens) ceste heureuse iournee, pour laquelle le Ciel nous à reserués, afin de voir l'entrée de nostre Roy dans sa ville. Nous grauerons encore ces mots en lettres d'or, sur vne table de Marbre, qui seront autant de marques de nostre zele à la posterité.

LOVYS XIII. sacré seurgeon des Fleurs de Lys, Roy tres-Chrestien, fils aîsné de l'Eglise, Prince incomparable, l'Amour du Ciel, & les delices de la terre, reçoit le veritable Oracle de la Pucelle d'Orleans, en l'an 1614. le quatriesme de son regne; & le douziesme de son âge fleurissant.

F I N.

17
est la confirmation de l'Etat & la
plénitude de votre Royale per-
sonne.

Le Port de plus ample reconnaissance
de la reconnaissance, nous marquer
tous des plans (à la situation des An-
ciens) celle de l'entente pour
laquelle (à nous) les uns, sans
doute l'entente de notre Roy dans
la ville. Nous grâces nous en rendons
morts, à l'entente d'un autre de
Mort, qui l'ont autant de mar-
ques de notre zèle la postérité.

LOUIS XIII. Saint Augustin
des Plans de la Royauté Christiane, la
mise de l'Eglise Prince incomparable, à
mon du Ciel, et les de la terre, et
le véritable Ombre de la Parole d'Or-
dine, et l'an 1644. le quinquiesme de son
regne. Et le nouzième de son âge fleuris-
sant.

F. I. M.